

# **STATUT NAROD I PRAVDA**

Decembar 2023.

Na osnovu odredbi Zakona o političkim organizacijama ("Sl. list SR BiH" br. 27/91), Kongres **NAROD I PRAVDA**, na svome zasjedanju održanom u Sarajevu, dana 20.11.2021. godine, i na osnovu Statutarnih odluka Glavnog odbora od 04.12.2021. i 23.12.2023. godine,

## **S T A T U T NAROD I PRAVDA**

### **I OPĆE ODREDBE**

#### **Član 1. (Načelo postupanja)**

NAROD I PRAVDA je narodna stranka (u daljem tekstu: Stranka), utemeljena kao politička organizacija slobodno i dobrovoljno udruženih članova koja djeluje na cijeloj teritoriji Bosne i Hercegovine, u skladu sa svojim Programom i Statutom.

#### **Član 2. (Predmet statuta)**

Ovim Statutom se uređuje: pravni status, naziv, sjedište, pečat i simboli Stranke, predstavljanje i zastupanje, način informiranja javnosti, ciljevi, članstvo, unutarstranački odnosi, unutrašnja organizacijai organi Stranke, način njihova izbora i opoziva, kandidiranje i učešće u vlasti, imovina, sticanje, korištenje i raspolaganje sredstvima Stranke, prestanak rada, te druga pitanja od interesa za članstvo i rad Stranke.

#### **Član 3. (Pravni status)**

NAROD I PRAVDA je pravno lice, upisano u registar političkih organizacija koji se vodi pri nadležnom sudu. Stranka u pravnom prometu sa trećim licima za preuzete obaveze odgovara vlastitom imovinom, a posjeduje svoj žiroračun i devizni račun.

#### **Član 4. (Naziv Stranke)**

Naziv Stranke je: **NAROD I PRAVDA**

#### **Član 5. (Sjedište Stranke)**

Sjedište Stranke je u Sarajevu u ul. Hakije Kulenovića br. 12, Općina Centar.

Odluku o promjeni sjedišta Stranke donosi Predsjedništvo Stranke.

#### **Član 6. (Pečat Stranke)**

Stranka ima pečat koji je okruglog oblika. Pečat sadrži puni naziv Stranke i njen znak. Pečat teritorijalnih organizacionih jedinica je okruglog oblika koji sadrži puni naziv Stranke, znak Stranke i naziv teritorijalne organizacije.

Pravilnik o izgledu i upotrebi pečata donosi Predsjedništvo Stranke.

**Član 7.**  
**(Znak i zastava Stranke)**

Stranka ima svoj znak i zastavu.  
Pravilnik o izgledu znaka i zastave donosi Predsjedništvo Stranke.  
Originalni uzorci znaka i zastave čuvaju se u Sekretarijatu Stranke.

**Član 8.**  
**(Predstavljanje i zastupanje)**

Stranku u javnom i političkom životu, te u pravnom prometu zastupa i predstavlja predsjednik Stranke. U slučaju privremene spriječenosti Predsjednika, Stranku predstavlja Prvi zamjenik Predsjednika, a u nemogućnosti prvog zamjenika, Stranku predstavlja Drugi zamjenik, a dalje u njegovoj nemogućnosti Predsjedništvo Stranke će donijeti odluku koji će od članova Predsjedništva zastupati i predstavljati Stranku.

**Član 9.**  
**(Načelo javnosti)**

Rad Stranke i njenih organa je javan. Javnost rada ostvaruje se na javnim skupovima, tribinama, okruglim stolovima, izvještavanjem javnosti i članstva putem saopćenja, izjava, reagiranja, konferencija za medije, prisustvom predstavnika javnog informiranja na skupovima Stranke, te na druge prikladne načine.

Javnost se može isključiti iz rada pojedinih tijela Stranke kada je to u interesu Stranke, o čemu odlučuje Predsjedništvo Stranke.

**Član 10.**  
**(Glasila Stranke)**

Stranka radi ostvarivanja svoga Programa može imati vlastita glasila kako elektronska tako i štampana, a može se služiti i ostalim sredstvima javnog informiranja.

**Član 11.**  
**(Gramatička terminologija)**

Gramatička terminologija korištenja muškog i ženskog spola podrazumijeva uključivanje oba spola.

**Član 12.**  
**(Poslovna tajna)**

Poslovnom tajnom Stranke smatraju se isprave i podaci vezani za rad i političko djelovanje Stranke, a čije bi objavljivanje bilo protivno interesima Stranke. Odluku o tome šta se smatra poslovnom tajnom donosi Glavni odbor.

## **II CILJEVI STRANKE**

**Član 13.**  
**(Osnovni ciljevi Stranke)**

U skladu sa programskom orijentacijom i principima Stranke, osnovni ciljevi Stranke su:

- vraćanje prava narodu i građanima;

- izgradnja Bosne i Hercegovine kao demokratske države sa svim njenim ravnopravnim narodima i građanima, poštivanjem osnovnih ljudskih prava bez obzira na vjersku, etičku, rasnu ili bilo koju drugu opredjeljenost i porijeklo;
- borba protiv korupcije, organiziranog kriminala i terorizma;
- vraćanje dostojanstva boračkoj populaciji kroz zapošljavanje i egzistencijalno zbrinjavanje;
- stručna, depolitizirana, odgovorna i profesionalna javna uprava, te modernizacija kroz uvođenje novih trendova i tehnologija;
- održiv i uravnotežen ekonomski razvoj, visoka zaposlenost i socijalna sigurnost, bolji životni standard i kvalitet življenja;
- uvođenje jedinstvenog obrazovnog sistema u Bosni i Hercegovini, usklađenog sa evropskim standardima, deklaracijama i programima kako bi naša država postala dio jedinstvenog evropskog prostora obrazovanja, znanja i nauke;
- podsticanje i izgradnja poduzetničkog duha među mladima te njihova afirmacija u društveno političkim zbivanjima;
- socijalna zaštita, briga o licima sa posebnim potrebama i djeci sa poteškoćama u razvoju;
- ravnopravnost spolova i zaštita žene kao osnovnog stuba porodice;
- sloboda medija, nezavisnost i profesionalizam javnih servisa;
- organizirana saradnja države sa dijasporom, jačanje međusobne pomoći i podrške;
- reforma sistema pružanja zdravstvenih usluga;
- razvoj i promocija kulturnih vrijednosti te očuvanje kulturne baštine Bosne i Hercegovine;
- razvoj i afirmacija sporta;
- zaštita i unapređenje životne sredine.

#### **Član 14. (Ostvarivanje ciljeva Stranke)**

Stranka svoje programske ciljeve ostvaruje djelovanjem u javnom životu i vršenjem vlasti, oblikovanjem javnog mnijenja i drugim oblicima demokratskog parlamentarnog i vanparlamentarnog djelovanja ustrajavajući na poštivanju ustavnosti i zakonitosti. Jedan od mogućih oblika djelovanja Stranke jesu predizborne ili postizborne koalicije, o čemu odlučuju organi Stranke u skladu sa Statutom.

#### **Član 15. (Odnosi sa drugim političkim strankama, organizacijama ili udruženjima)**

Stranka na osnovu odluke Predsjedništva, a uz prethodnu saglasnost Glavnog odbora saraduje sa drugim političkim strankama, organizacijama, pokretima i udruženjima u Bosni i Hercegovini i inostranstvu istih ili sličnih programskih načela i ciljeva. Stranka se može na osnovu odluke Predsjedništva, a uz prethodnu saglasnost Glavnog odbora učlanjivati u međunarodna udruženja srodnih stranaka ukoliko to pridonosi ostvarivanju njenih programskih ciljeva.

### **III ČLANSTVO**

#### **Član 16. (Vrste članstva)**

Članstvo u Stranci može biti :

- redovno;
- aktivno;
- počasno.

Stranka može okupljati i simpatizere Stranke.

**Član 17.**  
**(Redovno članstvo)**

Članom Stranke može postati svaki punoljetan, poslovno sposoban građanin Bosne i Hercegovine koji prihvata ciljeve i principe Stranke, odgovorno izvršava članske obaveze i kod koga ne postoje prepreke u članstvu predviđene ovim Statutom.

Redovni članovi Stranke s prebivalištem u Bosni i Hercegovini u pravilu su organizirani prema mjestu vlastitog prebivališta, odnosno u najbližem organizacionom obliku Stranke (općinska organizacija), a članovi sa privremenim boravkom van BiH, upisuju se samo u Glavni registar članstva Stranke.

**Član 18.**  
**(Aktivno članstvo)**

Aktivni članovi su oni koji su uz sve navedeno iz člana 17. stava (1), i članovi organa Stranke, kandidati za organe Stranke, koji se iskazuju u stranačkim aktivnostima i koji redovno plaćaju članarinu.

**Član 19.**  
**(Počasno članstvo)**

Stranka može imati svoje počasne članove o čemu odluku donosi Predsjedništvo Stranke. Počasnim članom može postati osoba koja u svom političkom djelovanju podržava ideje za koje se zalaže Stranka, kao i osoba koja je svojim javnim istupima i neposrednim djelovanjem promovirala i podržavala Stranku u zemlji i inostranstvu.

Počasni član Stranke može postati i osoba koja nije državljanin Bosne i Hercegovine. O počasnim članovima vodi se poseban registar.

Počasni članovi Stranke imaju sva prava redovnih članova, osim prava da biraju i budu birani u skladu sa ovim Statutom.

**Član 20.**  
**(Simpatizeri Stranke)**

U stranci se mogu okupljati i pojedinci koji nisu članovi Stranke a žele svojim znanjem i aktivnostima doprinijeti jačanju Stranke promovirajući vrijednosti za koje se Stranka zalaže. Takve osobe su simpatizeri Stranke a njihovu evidenciju vodi Sekretarijat Stranke.

**Član 21.**  
**(Prijem u članstvo)**

Članstvo Stranke moguće je pod jednakim uvjetima svakom punoljetnom državljaninu Bosne i Hercegovine, koji je upoznat sa Statutom i programom Stranke i prihvata ih.

Članom Stranke postaje se potpisom pristupnice i upisom u registar članova. Prijem novih članova mogu izvršiti svi organi na svim nivoima organiziranja Stranke. Potpisana pristupnica dostavlja se nadležnoj općinskoj organizaciji u kojoj novoprimitljivi član ima prebivalište. Registar članova vodi Sekretarijat Stranke.

**Član 22.**  
**(Evidencija članova)**

Evidenciju članstva vodi Sekretarijat Stranke. Članovi Stranke se upisuju u registar Stranke. Izgled, sadržaj registra, postupak upisa i brisanja članova, te način raspolaganja podacima o članovima utvrđuje se pravilnikom koji donosi Predsjedništvo Stranke. Registar se vodi u sjedištu Stranke. Član dobija člansku kartu sa upisom njegovog statusa (član ili počasni član).

**Član 23.**  
**(Pravo članova)**

Član Stranke ima pravo :

- da ravnopravno učestvuje u aktivnostima Stranke;
- da učestvuje u kreiranju i ostvarivanju politike Stranke;
- da bira i bude biran u organe Stranke;
- da kandidira i da se kandidira za sve funkcije u Stranci,
- da bude informiran o aktivnostima Stranke;
- da slobodno izražava svoje mišljenje i stavove;
- da ostvaruje i druga prava u skladu sa Statutom i drugim aktima Stranke.

**Član 24.**  
**(Obaveza članova)**

Član Stranke ima obavezu :

- da djeluje u skladu sa programom i Statutom Stranke;
- da se aktivno zalaže za ostvarivanje ciljeva Stranke;
- da aktivno sprovodi politiku Stranke i odluke organa Stranke;
- da čuva i unapređuje ugled Stranke;
- da svojim angažmanom u izbornoj kampanji aktivno doprinosi uspjehu Stranke na izborima;
- da redovno plaća članarinu;
- da ispunjava i druge obaveze u skladu sa Statutom i ostalim aktima Stranke.

**Član 25.**  
**(Članarina)**

Aktivni članovi su dužni redovno plaćati članarinu. Odluku o visini članarine donosi Glavni odbor na prijedlog Predsjedništva Stranke, pri čemu će uzeti u obzir imovinsko stanje člana.

Član koji je kandidat za bilo koju funkciju u Stranci i kandidat na izborima za bilo koju poziciju dužan je redovno plaćati članarinu.

Evidenciju o plaćanju članarine vodi Sekretarijat Stranke.

**Član 26.**  
**(Prepreka za članstvo u Stranci)**

Osoba ne može postati članom Stranke:

- ako je član druge političke organizacije u BiH;
- ako je član druge organizacije, udruženja ili pokreta čije je djelovanje nespojivo sa Programom Stranke.

**Član 27.**  
**(Prestanak članstva)**

Članstvo u Stranci prestaje:

- istupanjem iz članstva;
- isključenjem iz članstva;
- smrću.

**Član 28.**  
**(Istupanje iz članstva)**

Za istupanje iz članstva podnosi se pismena izjava, koja ne mora biti obrazložena, a Generalni sekretar Stranke na zahtjev člana izdaje potvrdu o istupanju iz članstva u Stranci.

**Član 29.**  
**(Isključenje iz članstva)**

Iz Stranke se isključuje član koji:

- ne poštuje Statut i program Stranke, kao i druge opće i pojedinačne akte Stranke, te odluke koje donose nadležni organi i tijela Stranke u okviru svoje nadležnosti;
- svojim djelovanjem ili postupanjem nanosi štetu interesima Stranke;
- u javnosti iznosi političke stavove koji su u suprotnosti sa Statutom i programom Stranke, te odlukama nadležnih organa i tijela Stranke u okviru svoje nadležnosti;
- da je prilikom učlanjenja u Stranku dao netačne ili neistinite podatke;
- kontinuirano odbija sudjelovanje u redovnim i vanrednim aktivnostima Stranke;
- koji je rješenjem Etičkog komiteta isključen iz Stranke.

**Član 30.**  
**(Odlučivanje o isključenju)**

Postupak radi utvrđivanja odgovornosti člana, odlučivanje i izricanje mjere isključenja člana urediće se posebnim pravilnikom koji donosi Glavni odbor stranke.

**IV UNUTARSTRANAČKI ODNOSI**

**Član 31.**  
**(Princip demokratskog jedinstva)**

Unutrastranački odnosi u Stranci se zasnivaju na principu demokratskog jedinstva koji uključuje:

- poštivanje slobode mišljenja i slobode izražavanja unutar Stranke;
- uvažavanje mišljenja većine i obavezu njihovog ostvarivanja u praksi;
- pravo svakog pojedinca da zadrži i u Stranci izražava vlastito mišljenje pod uvjetom da nije u suprotnosti sa programskim ciljevima, principima i ovim Statutom.

**Član 32.**  
**(Donošenje odluka)**

Organi Stranke punovažno odlučuju kada je prisutno više od polovine od ukupnog broja njihovih članova a Kongres ako je prisutno više od dvije trećine od ukupnog broja delegata. Organi donose Odluke većinom glasova od ukupnog broja, osim ako ovim Statutom nije drugačije određeno.

U svim organima Stranke, glasanje se u pravilu vrši javno, osim kad taj organ odluči drugačije.

Svaki član Stranke može zatražiti da se određeno pitanje stavi na dnevni red i da nadležni organ Stranke o njemu odluči.

**Član 33.**  
**(Izbor članova organa Stranke)**

Glavni odbor svojom odlukom raspisuje unutarstranačke izbore za sve nivoe Stranke, izuzev izbora članova u organe koji će se na prijedlog Predsjedništva formirati prije zasjedanja prvog Kongresa. Glavni odbor će donijeti Pravila izbornog postupka kojima se utvrđuju kriteriji i postupak izbora članova organa Stranke.

Mandat izabranih članova u svim organima Stranke na svim nivoima traje 5 (pet) godina, te isti mogu biti birani dva mandata uzastopno. Izabrani član može biti biran i za treći mandat izuzetno ukoliko ostvari rezultat koji je za 20% veći od posljednjeg rezultata koji je izabrani član ostvario. Nosiocu funkcije ili članu u organima Stranke prestaje mandat prije isteka vremena na koje je izabran, prestankom članstva u Stranci, podnošenjem ostavke ili odlukom organa koji ga je izabrao.

**Član 34.**  
**(Spolna, dobna, nacionalna i teritorijalna zastupljenost)**

U organima Stranke na nivou države uvažava se spolna, dobna, nacionalna i teritorijalna zastupljenost, o čemu vodi računa Nadležni organ odlukom o kandidiranju i izboru članova organa Stranke.

**Član 35.**  
**(Disciplinski postupak)**

Posebnim Pravilnikom koji će donijeti Glavni odbor, a u skladu sa Etičkim kodeksom, regulisat će se postupak utvrđivanja disciplinske odgovornosti člana, odlučivanje i izricanju disciplinskih mjera.

Disciplinske mjere koje se mogu izreći su:

- a) pismena opomena,
- b) javna opomena sa kojom se upoznaje članstvo organizacije;
- c) isključenje iz Stranke.

U prvom stepenu odluku donosi kantonalni/regionalni izvršni odbor ili izvršni odbor Brčko Distrikt BiH, a po žalbi odlučuje Etički komitet Naroda i Pravde.

Izuzetno, odluku u prvom stepenu može donijeti Predsjedništvo ili Glavni odbor.

**V ORGANIZACIONA STRUKTURA STRANKE**

**Član 36.**  
**(Načela organizacije)**

Stranka je organizirana na teritorijalnom principu na području Bosne i Hercegovine. Članovi stranke mogu se unutar Stranke organizirati i prema interesnoj osnovi u interesne odbore.

**Član 37.**  
**(Teritorijalna organizacija stranke)**

Stranka djeluje kao jedinstvena politička organizacija na području Bosne i Hercegovine, organizirana na teritorijalnom principu, putem sljedećih organizacijskih oblika:

- općinske organizacije;
- gradske organizacije;
- kantonalne organizacije (FBiH)/regionalne organizacije (RS);
- organi Stranke na nivou države Bosne i Hercegovine.

U općinama, gradovima kantonima i regijama gdje nisu formirane organizacije Stranke djelovat će povjerenici odnosno povjereništva Stranke.



## **VI OPĆINSKE ORGANIZACIJE STRANKE**

### **Član 38. (Područje i način osnivanja općinske organizacije)**

Općinska organizacija je osnovna organizaciona jedinica Stranke koja se osniva za područje jedne općine, za čije osnivanje je potrebno najmanje 15 (petnaest) članova Stranke (Povjereništvo). Područje djelovanja općinske organizacije stranke podudara se sa administrativno-teritorijalnim ustrojem BiH.

Općinska organizacija može osnivati i vlastite ogranke na području mjesnih zajednica u svojoj jedinici lokalne samouprave.

„Organi općinske/gradske organizacije su: Skupština općinske/gradske organizacije i Općinski/gradski izvršni odbor.“

### **Član 39. (Rad općinske organizacije)**

Općinska organizacija djeluje samostalno u skladu sa Statutom, programom i drugim aktima Stranke promovirajući ciljeve i načela rada Stranke, te ostvaruje programsku politiku Stranke neposrednim djelovanjem svojih članova.

### **Član 40. (Načelo pripadnosti općinskoj organizaciji)**

Svaki član Stranke obavezno pripada jednoj od općinskih organizacija Stranke prema mjestu prebivališta.

U općinama i gradovima u kojima ne postoji općinska organizacija, članovi Stranke pripadaju općinskoj organizaciji u najbližoj jedinici lokalne samouprave.

U slučaju promjene prebivališta i boravišta, član se putem Sekretarijata Stranke odjavljuje u matičnoj lokalnoj organizaciji i prijavljuje u općinsku organizaciju novog prebivališta, te se uključuje u njezin rad.

Kada član Stranke duže vrijeme boravi izvan područja svog prebivališta tada se on uključuje u rad lokalne organizacije u mjestu boravišta.

Organ lokalne organizacije može osnivati i vlastite ogranke na području mjesne samouprave u svojoj jedinici lokalne samouprave.

### **Član 41. (Općinski izvršni odbor)**

Općinski izvršni odbor je navažniji organ općinske organizacije, koji ima do 30 članova. Odluku o broju članova donosi Općinska skupština koja ujedno bira članove Općinskog izvršnog odbora iz reda više kandidata od broja koji se bira. Predsjednika i potpredsjednike Općinskog izvršnog odbora Stranke bira Općinski izvršni odbor po svome konstituiranju, na prijedlog 1/3 članova odbora.

Članovi Općinskog izvršnog odbora po položaju su predsjednik/ca Organizacije mladih, predsjednica Organizacije žena i predsjednik/ca Kluba vijećnika i sekretar/ka općinske organizacije.

Sekretar/ka općinske organizacije bira se aklamacijom na konstituirajućoj sjednici Skupštine na prijedlog Predsjedavajućeg.

Općinski izvršni odbor Stranke djeluje prema poslovniku koji donosi na konstituirajućoj sjednici, u skladu sa ovim Statutom.

**Član 42.**  
**(Općinska skupština)**

Općinska skupština formira se na predstavničkom principu.

Odluku o broju i strukturi članova skupštine općinske/gradske organizacije koji se biraju iz mjesnih ogranaka donosi kantonalni/regionalni izvršni odbor na osnovu broja osvojenih glasova na posljednjim lokalnim i općim izborima, a na prijedlog općinskog/gradskog izvršnog odbora, koji ne može biti veći od 55 članova.

Predsjednici mjesnih ogranaka, aktuelni općinski vijećnici u općinskim vijećima, prema položaju su članovi Skupštine općinske/gradske organizacije, a preostali broj članova skupštine općinske/gradske organizacije bira se sa lista članova mjesnih ogranaka te općinske/gradske organizacije.

Predsjednika i potpredsjednike bira skupština na svojoj konstituirajućoj sjednici na prijedlog 1/3 članova Skupštine.

Općinska skupština djeluje prema poslovniku koji donosi na konstituirajućoj sjednici, u skladu sa ovim Statutom.

**Član 43.**  
**(Nadležnost Općinskog odbora)**

Zadaci Općinskog odbora su:

- pokreće i provodi političku aktivnost u općinskoj organizaciji i prati njezino ostvarivanje;
- provodi odluke i akte viših organa Stranke;
- imenuje stalne ili povremene komisije ili tijela za pojedine oblasti;
- organizira skupove i javne tribine sa ciljem razmatranja unutarstranačkih i društvenih pitanja;
- po prijedlogu predsjednika Općinskog odbora bira se općinski izborni štab;
- utvrđuje izborni program za lokalne izbore i prati njegovu realizaciju;
- utvrđuje, uz prethodno pribavljanje mišljenja Kantonalnog odbora i saglasnosti Predsjedništva Stranke, kandidate za načelnika općine i liste vijeća;
- bavi se i svim drugim pitanjima i aktivnostima u skladu sa Programom i Statutom Stranke u cilju ostvarivanja što boljeg izbornog rezultata Stranke.

**Član 44.**  
**(Nadležnosti Općinske skupštine)**

Skupština donosi odluku o broju članova izvršnog odbora, te vrši izbor članova izvršnog odbora.

Skupština donosi konačnu odluku o uspostavljanju koalicija na općinskom nivou, potvrđuje konačne liste za općinsko vijeće, i kandidata za načelnika općine.

Najmanje jednom godišnje Skupština razmatra izvještaj o radu izvršnog odbora, te usvaja godišnji plan i program rada.

**Član 45.**  
**(Predsjednik Općinskog izvršnog odbora)**

Predsjednik Općinskog izvršnog odbora rukovodi radom Općinskog izvršnog odbora, saziva sjednice Općinskog izvršnog odbora, predstavlja u javnosti Općinski izvršni odbor te koordinira rad Općinskog

izvršnog odbora sa organima Stranke višeg nivoa. Predsjednik Općinskog izvršnog odbora dužan je da sazove sjednicu odbora na pismeni zahtjev 1/3 od ukupnog broja članova, u roku od sedam dana od dana prijema zahtjeva, a ukoliko ne sazove sjednicu u navedenom roku, sjednicu može sazvati Predsjednik Stranke, kao organ koji osigurava jedinstvo i cjelovito funkcioniranje Stranke i određuje člana Glavnog odbora koji će tu sjednicu voditi.

**Član 46.**  
**(Predsjednik Općinske skupštine)**

Rukovodi i organizira rad Općinske skupštine.

Prisustvuje sjednicama i aktivno učestvuje u radu izvršnog/općinskog odbora, bez prava glasa. Predsjednika Općinske skupštine biraju članovi Skupštine na svojoj konstituirajućoj sjednici, a za kandidaturu je neophodna podrška najmanje 1/4 članova Skupštine.

**VII ORGANIZACIJA NA NIVOU GRADOVA I BRČKO DISTRIKTA BOSNE I HERCEGOVINE**

**Član 47.**  
**(Gradske organizacije Stranke)**

Za područje Brčko Distrikta BiH i gradova primjenjuju se odredbe ovoga Statuta koji se odnose na općinske organizacije.

**VIII ORGANIZACIJE NA NIVOU KANTONA I REGIJA**

**Član 48.**  
**(Kantonalna organizacija Stranke)**

Na području kantona djeluje Kantonalna organizacija Stranke, koju čine sve općinske i gradske organizacije Stranke s područja kantona, a najmanje 3 (tri) organizacije.

Regionalnu organizaciju, čine sve općinske i gradske organizacije Stranke, s područja regije, a najmanje 3 (tri) organizacije.

Organi Kantonalne/Regionalne organizacije su: Skupština kantonalne/regionalne organizacije i Kantonalni/Regionalni izvršni odbor.

**Član 49.**  
**(Kantonalni izvršni odbor)**

Za područje kantona formira se Kantonalni izvršni odbor Stranke po prijedlogu Predsjedništva Stranke. U Kantonalni odbor Stranke, svaki općinski odbor Stranke bira jednog ili više članova zavisno od veličine te organizacije, s tim što predsjednik Izvršnog odbora općinske organizacije Stranke prema funkciji, ulazi u sastav Kantonalnog odbora Stranke, ali u okviru dodijeljene općinske kvote tom odboru. Broj članova koji se biraju iz pojedinih općinskih organizacija utvrđuje se Odlukom Predsjedništva Stranke. Kantonalni odbor Stranke, uz saglasnost Predsjedništva Stranke, iz svoga sastava bira predsjednika i sekretara, a po potrebi jednog ili više potpredsjednika.

Članovi koji po položaju ulaze u sastav Kantonalnog odbora su: predsjednik Kluba poslanika u zakonodavnom tijelu kantona, predsjednik/ca Organizacije mladih, predsjednica Organizacije žena, te sekretar/ka Kantonalne/Regionalne organizacije.

Odluke Kantonalnog izvršnog odbora obavezne su za članstvo i općinske organizacije.

#### **Član 50.** **(Kantonalna/Regionalna skupština)**

Kantonalna/Regionalna skupština formira se na predstavničkom principu.

Odluku o broju i strukturi članova Skupštine kantonalne/regionalne organizacije koji se biraju iz općinskih organizacija donosi Predsjedništvo Stranke na osnovu broja osvojenih glasova na posljednjim lokalnim i općim izborima, a na prijedlog Generalnog sekretara, koji ne može biti veći od 75 članova.

Predsjednici Skupština općinskih/gradskih organizacija i aktuelni kantonalni zastupnici, prema položaju su članovi Skupštine kantonalne/regionalne organizacije, a preostali broj članova kantonalne/regionalne organizacije bira se iz općinskih/gradskih organizacija

Predsjednika i potpredsjednike bira Skupština na svojoj konstituirajućoj sjednici.

Kantonalna/regionalna skupština djeluje prema poslovniku koji donosi na konstituirajućoj sjednici, u skladu sa ovim Statutom.

#### **Član 51.** **(Nadležnost Kantonalnog izvršnog odbora)**

Zadaci Kantonalnog odbora su:

- inicira i usmjerava političku aktivnost u Kantonalnoj organizaciji, prati njezino ostvarivanje
- razmatra društveno-političke prilike na području kantona;
- provodi odluke i akte viših organa Stranke;
- utvrđuje politiku i koordinira rad općinskih organizacija Stranke;
- utvrđuje, uz saglasnost Predsjedništva Stranke, kandidate Stranke za premijera i ministre u kantonalnoj vladi, prijedlog kandidata Stranke za zastupnike u kantonalnoj skupštini, te daje prijedloge kandidata za izvršne i druge političke funkcije na području kantona;
- utvrđuje izborni program Stranke za izbore na nivou kantona, bira kantonalni izborni štab, po potrebi organizira skupove članova Stranke i javne tribine sa ciljem razmatranja pojedinih unutarstranačkih ili društvenih pitanja;
- po potrebi formira stalne ili povremene komisije ili savjete, čiji članovi ne moraju biti članovi kantonalnog odbora.

#### **Član 52.** **(Nadležnosti Kantonalne/Regionalne skupštine)**

Skupština donosi odluku o broju članova izvršnog odbora, te vrši izbor članova izvršnog odbora.

Skupština donosi konačnu odluku o uspostavljanju koalicija na kantonalnom/regionalnom nivou, potvrđuje konačne liste za Kantonalnu skupštinu.

Najmanje jednom godišnje Skupština razmatra izvještaj o radu izvršnog odbora, te usvaja godišnji plan i program rada.

**Član 53.**  
**(Predsjednik Kantonalnog izvršnog odbora)**

Predsjednik Kantonalnog izvršnog odbora rukovodi radom izvršnog odbora, saziva sjednice Kantonalnog izvršnog odbora, predstavlja u javnosti Kantonalni izvršni odbor te koordinira rad Kantonalnog izvršnog odbora sa organima Stranke višeg nivoa.

Predsjednik kantonalnog odbora Stranke dužan je sazvati sjednicu Kantonalnog odbora na zahtjev 1/3 članova u roku od sedam dana od dana prijema zahtjeva u skladu sa poslovníkom.

Ukoliko Predsjednik kantonalnog odbora odbije da sazove sjednicu, sjednicu saziva Predsjednik Stranke, te određuje i člana Glavnog odbora koji će voditi sjednicu.

**Član 54.**  
**(Predsjednik Kantonalne/Regionalne skupštine)**

Rukovodi i organizuje rad Kantonalne/Regionalne skupštine.

Prisustvuje sjednicama i aktivno učestvuje u radu Kantonalnog izvršnog odbora, bez prava glasa. Predsjednika Kantonalne/Regionalne skupštine biraju članovi Skupštine na svojoj konstituirajućoj sjednici, a za kandidaturu je neophodna podrška najmanje 1/4 članova Skupštine ili 3 novoizabrane skupštine općinske/gradske organizacije.“

**Član 55.**  
**(Povjereništva)**

Ukoliko se iz objektivnih razloga ne mogu provesti unutarstranački izbori i izabrati mjesni, općinski ili kantonalni/regionalni/gradski odbori na određenim područjima, na prijedlog organa Stranke višeg nivoa u odnosu na organ koji nije uspostavljen, Predsjedništvo Stranke može uvesti Povjereništvo na rok ne duži od 12 (dvanaest) mjeseci kada se trebaju provesti unutarstranački izbori u skladu sa Statutom i Pravilima izbornog postupka Stranke.

Ukoliko se iz objektivnih razloga izbori ne mogu održati u roku od 12 (dvanaest) mjeseci, mandat povjereništva se može i produžiti najkasnije do raspisivanja unutarstranačkih izbora.

**XIX ORGANI STRANKE NA NIVOU BOSNE I HERCEGOVINE**

**Član 56.**  
**(Organi Stranke)**

Organi Stranke na državnom nivou su:

- Kongres;
- Glavni odbor;
- Predsjednik;
- Prvi zamjenik predsjednika Stranke;
- Drugi zamjenik predsjednika Stranke;
- Potpredsjednici;
- Predsjedništvo;
- Nadzorni odbor.

**Član 57.**  
**(Kongres Stranke)**

Kongres je najviši organ Stranke i njegove odluke obavezne su za sve članove i organe Stranke. Kongres može biti redovni i vanredni. Redovni Kongres održava se svakih 5 (pet) godina, a zavisno od potreba može se sazvati i ranije (vanredni). Odluku o sazivanju Kongresa donosi Glavni odbor. Kongres se

saziva najmanje 2 (dva) mjeseca prije njegovog održavanja. Odlukom se određuje broj delegata i datum održavanja Kongresa. Prijedlozi dokumenata dostavljaju se delegatima najkasnije 10 dana prije održavanja Kongresa. Predsjednik Stranke rukovodi Kongresom do izbora radnog predsjedništva. Incijativu za sazivanje vanrednog Kongresa donosi najmanje 1/3 (jedna trećina) općinskih organizacija Stranke, 1/3 (jedna trećina) kantonalnih/regionalnih organizacija Stranke, te 1/3 (jedna trećina) članova Glavnog odbora. Za odluke nižih nivoa organizacije potrebna je odluka izvršnih organa tih organizacija. Delegati Kongresa biraju se u općinskim i kantonalnim organizacijama. Određen broj delegata Kongresa bira se prema položaju, a jedan broj delegata bira Predsjednik Stranke. Predsjednik stranke može imenovati do 5 % delegata u odnosu na ukupan broj delegata na Kongresu.

#### **Član 58.** **(Nadležnost Kongresa)**

Nadležnosti Kongresa Stranke: usvaja Program Stranke i njegove izmjene, usvaja Statut Stranke i njegove izmjene, razmatra i ocjenjuje rad Stranke između dva Kongresa, bira Predsjednika Stranke, bira zamjenika Predsjednika Stranke, bira potpredsjednike Stranke, bira Glavni odbor Stranke, Nadzorni odbor i donosi druge akte općeg karaktera. Na prijedlog Glavnog odbora, Kongres može donijeti i odluku o prestanku rada Stranke, o spajanju sa drugom političkom strankom, te o postupanju sa imovinom Stranke u takvim slučajevima.

Kongres može početi sa radom kada se osigura prisustvo najmanje dvije trećine delegata. Odluke na Kongresu se donose natpolovičnom većinom od ukupnog broja delegata izuzev Odluka o donošenju Programa rada, Statuta, njihovih izmjena, prestanka rada Stranke za što je potrebna dvotrećinska većina delegata Kongresa.

Kongres donosi Poslovnik o radu.

#### **Član 59.** **(Glavni odbor)**

Glavni odbor je najviši organ političkog rukovođenja i ostvarivanja politike Stranke između dva Kongresa. Glavni odbor broji 99 (devedesetdevet) članova koje bira Kongres vodeći računa o teritorijalnoj, nacionalnoj, socijalnoj, spolnoj i starosnoj zastupljenosti članova Stranke.

Glavni odbor iz svoga sastava bira predsjednika Glavnog odbora i zamjenike predsjednika Glavnog odbora. Predsjednici kantonalnih odbora Stranke i predsjednik odbora za Brčko Distrikt Bosne i Hercegovine su, prema položaju članovi Glavnog odbora. Predsjednik Stranke može imenovati do 5 % članova Glavnog odbora od ukupnog broja članova Glavnog odbora. Glavni odbor zasjeda po potrebia najmanje četiri puta godišnje. Predsjednik Glavnog odbora će sazvati sjednicu Glavnog odbora ako to zatraži Predsjedništvo Stranke ili 1/4 (jedna četvrtina) članova Glavnog odbora. Glavni odbor može između dva Kongresa donijeti odluku o povećanju broja članova Glavnog odbora do 5% od ukupnog broja članova Glavnog obora. Izbor novih članova Glavnog odbora od strane Predsjednika Stranke vrše se uz saglasnost Predsjedništva Stranke.

#### **Član 60.** **(Nadležnost Glavnog odbora)**

Nadležnosti Glavnog odbora su:

- utvrđuje pravce i ciljeve, kao i opće aktivnosti Stranke između dva Kongresa, te prati njihovo ostvarivanje i za svoj rad odgovara Kongresu;
- utvrđuje prijedloge dokumenata i drugih akata (Program, Statut, rezolucije, deklaracije, odluke itd.) koje donosi Kongres;
- vrši ocjenu usaglašenosti programa i politike Kongresa stranke i daje političke smjernice za djelovanje Stranke i njenih organa između dva Kongresa;
- donosi odluke od posebnog značaja između dva Kongresa;
- brine se o provođenju odluka i drugih akata Kongresa;
- bira i razrješava Predsjedništvo i druge organe i funkcionere Stranke;

- na prijedlog Predsjednika Stranke imenuje odbore, komisije i savjete iz svoje nadležnosti;
- razmatra i usvaja izvještaje o finansijskom poslovanju Stranke i donosi godišnji finansijski plan Stranke;
- raspisuje izbore u Stranci;
- najmanje jedanput godišnje razmatra ostvarivanje Programa Stranke;
- na prijedlog Predsjedništva, odlučuje o stupanju Stranke u predizborne ili postizborne koalicije na državnom, entitetskom i kantonalnom nivou.
- donosi Poslovnik o radu.
- obavlja i druge poslove u skladu s ovim Statutom.

### **Član 61. (Predsjednik Glavnog odbora)**

Sjednicu Glavnog odbora saziva predsjednik Glavnog odbora.

Predsjednik Glavnog odbora može sazvati sjednicu samoinicijativno ili na zahtjev Predsjedništva Stranke ili na zahtjev najmanje 1/4 (jedne četvrtine) članova Glavnog odbora.

Predsjednik Glavnog odbora dužan je sazvati sjednicu Glavnog odbora u roku od sedam dana od dana prijema prijedloga.

Ukoliko predsjednik Glavnog odbora ne sazove sjednicu Glavnog odbora u predviđenom roku, sjednicu u roku od tri dana saziva jedan od zamjenika predsjednika Glavnog odbora, a ukoliko isti to ne učini sjednicu Glavnog odbora saziva Predsjednik Stranke.

Dnevni red sjednice Glavnog odbora predlažu predsjednik i zamjenici Glavnog odbora.

### **Član 62. (Predsjednik Stranke)**

Predsjednik Stranke je politički i izvršni organ stranke koji osigurava jedinstvo i cjelovito funkcioniranje Stranke. Predsjednik Stranke se bira na Kongresu Stranke. Za Predsjednika je izabran kandidat koji dobije natpolovičnu većinu glasova prisutnih delegata Kongresa. Ako nijedan kandidat ne dobije potrebnu većinu, izbor se ponavlja između dva kandidata koji su dobili najviše glasova. Izabran je kandidat koji u drugom krugu glasanja dobije više glasova. Za svoj rad Predsjednik Stranke odgovara Kongresu Stranke.

Predsjednik Stranke:

- predstavlja i zastupa Stranku;
- provodi politiku Stranke u skladu sa programskim dokumentima, Statutom, odlukama i zaključcima nadležnih organa Stranke te donosi izvršne političke odluke, zaključke, upute i druge akte;
- predlaže potpredsjednike Stranke i članove Predsjedništva;
- saziva Predsjedništvo Stranke i predsjedava njegovim radom, kao i u radu njegovog odbora;
- brine se i osigurava međusobnu saradnju svih organa i tijela Stranke;
- podnosi ekspoze o svome radu Kongresu Stranke;
- odgovara zajedno sa Predsjedništvom Stranke za finansijsko poslovanje Stranke u skladu sa zakonima Bosne i Hercegovine;
- predlaže Predsjedništvu Stranke donošenje odluke o raspuštanju lokalnih i regionalnih odbora;
- predlaže Generalnog sekretara i Političkog direktora Stranke uz konsultacije sa zamjenikom;
- donosi odluku o dopunjavanju određenog broja članova u svim organima i tijelima Stranke, a najviše do 10% od ukupnog broja članova pojedinih organa, u skladu sa ovim Statutom;
- po potrebi saziva i predsjedava stalnim i povremenim radnim grupama u Stranci;
- te obavlja druge poslove u skladu sa Statutom.



**Član 63.**  
**(Prvi Zamjenik Predsjednika Stranke)**

Zamjenik Predsjednika Stranke mijenja Predsjednika Stranke u slučaju odsutnosti, spriječenosti i po potrebi. Prvi Zamjenik Predsjednika pomaže Predsjedniku u zaštiti principa Naroda i Pravde i ostvarivanju programskih ciljeva Stranke. Prvi Zamjenik Predsjednika koordinira rad Političkog direktora i Političke akademije Stranke, te aktivnosti i tijela u vezi sa saradnjom sa dijasporom. Prvi Zamjenik Predsjednika koordinira rad i potpredsjednika Stranke, koji mogu biti zaduženi za zastupanje Stranke u pojedinim oblastima političkog djelovanja. Prvi Zamjenik Predsjednika koordinira i rad Organizacije mladih i Organizacije žena Naroda i Pravde, kao i drugih posebnih organizacija Stranke u slučaju njihovog osnivanja.

Prvi zamjenik Predsjednika Stranke se bira na Kongresu Stranke na jednak način kao i Predsjednik stranke.

**Član 64.**  
**(Drugi Zamjenik Predsjednika Stranke)**

Drugi Zamjenik Predsjednika Stranke mijenja Predsjednika u slučaju odsutnosti i spriječenosti Prvog Zamjenika Predsjednika. Drugi Zamjenik koordinira aktivnostima vezanim za međunarodnu saradnju, evropske i NATO integracije. Drugi zamjenik Predsjednika Stranke se bira na Kongresu Stranke na jednak način kao i Predsjednik stranke.

**Član 65.**  
**(Potpredsjednici Stranke)**

Stranka ima najmanje 4 (četiri) potpredsjednika.

Potpredsjednike Stranke bira Kongres. Najmanje jedan potpredsjednik će biti sa teritorije manjeg bh. entiteta, a najmanje jedan potpredsjednik će biti pripadnica ženskog spola.

Potpredsjednici Stranke mogu biti zaduženi za zastupanje Stranke u pojedinim oblastima političkog djelovanja.

**Član 66.**  
**(Predsjedništvo Stranke)**

Predsjedništvo Stranke je izvršnopolitički organ Stranke koji broji 29 (dvadesetdevet) članova.

Članovi Predsjedništva Stranke po funkciji su: Predsjednik Stranke, Zamjenici predsjednika, potpredsjednici, predsjednik Glavnog odbora, Politički direktor Stranke, predsjednica Organizacije žena Narod i Pravda, predsjednik Organizacije mladih Narod i Pravda, predsjednici kantonalnih organizacija Stranke, predsjednik organizacije Narod i Pravda Brčko Distrikt Bosne i Hercegovine, predsjednik regije Sjeverozapad RS, predsjednik regije Sjeveroistok RS.

**Član 67.**  
**(Nadležnost Predsjedništva Stranke)**

Nadležnosti Predsjedništva su:

- provodi program Stranke, odluke Kongresa i Glavnog odbora Stranke;
- raspravlja o potrebi izmjena programa, Statuta i pravilnika, te utvrđuje njihov nacrt;



- kreira i provodi politiku međunarodne saradnje;
- koordinira rad regionalnih organizacija, te radi na jačanju organizacijske strukture i efikasnom provođenju politike i programa Stranke;
- analizira, raspravlja i zauzima stajališta o aktuelnim političkim pitanjima važnima za Bosnu i Hercegovinu i njezine građane;
- donosi odluku o raspuštanju općinskih i regionalnih odbora;
- na prijedlog predsjednika imenuje Generalnog sekretara i Političkog direktora;
- imenuje koordinatora rada interesnih odbora/savjeta;
- imenuje glasnogovornika i utvrđuje djelokrug njegovog rada;
- imenuje glavni izborni štab Stranke;
- radi na organizacionom jačanju Stranke i brine o informiranosti članstva;
- podnosi Glavnom odboru godišnji finansijski plan za narednu godinu i podnosi završni račun za tekuću godinu;
- predlaže Glavnom odboru iznos godišnje članarine i način njenog prikupljanja;
- upravlja imovinom Stranke i odgovara za njezino korištenje u skladu sa zakonima Bosne i Hercegovine;
- brine o zaštiti i upotrebi arhivske građe i drugih dokumenata;
- donosi odluke koje nisu u nadležnosti drugih organa Stranke, u skladu sa Statutom;
- donosi poslovnik o svom radu;
- predlaže kandidate za izbor poslanika u predstavničke organe entiteta Federacije BiH, entiteta Republika Srpska, Bosne i Hercegovine, kao i kandidate za izbor u Predsjedništvo BiH;
- predlaže kandidate za izvršne funkcije u organima vlasti na nivou entiteta i državnih organa;
- daje saglasnost za liste kandidata za sve nivoe vlasti predložene od lokalnih i regionalnih odbora;
- daje saglasnost na pravila Organizacije žena, Organizacije mladih, i druge;
- obavlja i druge poslove u skladu sa poslovníkom, Statutom i odlukama viših organa Stranke.

#### **Član 68.** **(Nadzorni odbor)**

Nadzorni odbor je kontrolno-nadzorni organ Stranke koji broji 3 (tri) člana. Nadzorni odbor na prvoj konstituirajućoj sjednici bira predsjednika Nadzornog odbora. Članovi Nadzornog odbora ne mogu biti članovi drugog organa Stranke. Nadzorni odbor za svoj rad odgovara Kongresu.

Nadzorni odbor kontroliše prihode i rashode Stranke, te način upravljanja imovinom koja je u vlasništvu Stranke ili kojom Stranka raspolaže po nekom drugom osnovu.

Odluke Nadzornog odbora su konačne i obavezujuće.

Nadzorni odbor jedanput godišnje podnosi Predsjedništvu Stranke izvještaj o unutarnjoj kontroli finansijskog poslovanja.

Nadzorni odbor donosi Poslovnik o radu.

#### **Član 69.** **(Statutarna komisija)**

Statutarna komisija ima 3 (tri) člana koja bira i razrješava Glavni odbor Stranke.

Statutarna Komisija za svoj rad odgovara Glavnom odboru stranke.

Statutarna komisija na prvoj konstituirajućoj sjednici bira svog predsjednika.

Statutarna komisija tumači Statut i druga akta Stranke, te odlučuje o usklađenosti akata i nadležnostima

Odluka, odnosno, tumačenje Statutarne komisije konačno je za sve organe i članove Stranke. Članovi Statutarne komisije ne mogu biti članovi drugih organa stranke na državnom nivou.

Statutarna komisija donosi Poslovnik o radu.

**Član 70.**  
**(Etički komitet)**

Etički Komitet ima 3 (tri) člana koje bira i razrješava Glavni odbor Stranke.  
Etički komitet za svoj rad odgovara Glavnom odboru Stranke.  
Etički komitet odlučuje o stranačkoj odgovornosti i ima nadležnost izricanja sankcije za nepoštivanje odredbi ovog Statuta.  
Članovi Etičkog komiteta ne mogu biti članovi nekog drugog organa Stranke.  
Etički komitet donosi svoj Poslovnik o radu.

**Član 71.**  
**(Generalni sekretar)**

Generalnog sekretara Stranke, na prijedlog Predsjednika Stranke, bira Predsjedništvo Stranke.  
Generalni sekretar Stranke pomaže Predsjedniku Stranke, zamjeniku Predsjednika Stranke, te predsjedniku i zamjenicima Glavnog odbora u organizaciji i koordinaciji njihovog rada, koordinira rad sekretara svih nivoa i stara se za organizaciono funkcioniranje Stranke, te ima druga ovlaštenja utvrđena ovim Statutom i aktima Predsjedništva Stranke.

**Član 72.**  
**(Sekretarijat)**

Stranka ima Sekretarijat za obavljanje stručnih i administrativnih poslova.  
Radom Sekretarijata rukovodi Generalni sekretar Stranke.  
Sekretarijat čine:

- Služba za pravne i opće poslove;
- Služba za finansijske poslove;
- Služba za medije i analitiku.

U okviru Sekretarijata se mogu formirati i dodatne službe koje obezbjeđuju funkcioniranje Stranke i podupiru realizaciju utvrđenih politika Stranke.  
Odluku o formiranju službi Sekretarijata donosi Predsjedništvo Stranke na prijedlog Generalnog sekretara.  
Predsjedništvo donosi Pravilnik o unutarnjoj organizaciji i sistematizaciji radnih mjesta Sekretarijata.

**Član 73.**  
**(Politička akademija)**

Stranka ima Političku akademiju.  
Politička akademija osniva se odlukom Predsjedništva Stranke.  
Cilj osnivanja Političke akademije jeste političko obrazovanje i usavršavanje, te podizanje nivoa političke komunikacije i kulture dijaloga članova Stranke.  
U okviru Političke akademije, formiraju se stručna i savjetodavna Vijeća za određene oblasti javnih politika.

**Član 74.**  
**(Politički direktor)**

Političkom akademijom rukovodi Politički direktor Stranke.  
Političkog direktora bira Predsjedništvo Stranke na prijedlog Predsjednika Stranke. Politički direktor rukovodi i organira rad Političke akademije, brine o unapređenju organizacije stranačke strukture,

predlaže mjere za unapređenje Stranke, analizira rad i odnose sa javnošću organa stranke, predlaže smjernice politika Stranke i analizira organe da li se pridržavaju politika i ciljeva Stranke i prati provedbu izbornog programa o čemu izvještava Predsjedništvo i Glavni odbor Stranke. Politički direktor je po položaju član Predsjedništva Stranke.

#### **Član 75. (Dualizam funkcija)**

Nije dozvoljeno obnašanje više od jedne stranačke funkcije, osim onih koje se dobijaju po funkciji. Izabrani nosilac funkcije dužan je u roku od sedam dana od dana izbora odlučiti koju funkciju zadržava.

#### **Član 76. (Kooptiranje u stranačkim organima)**

Predsjednik Stranke i Glavni odbor su jedini ovlašteni da po potrebi dopune organe Stranke na državnom nivou dodatnim članovima radi uspostavljanja teritorijalne, nacionalne, spolne i dobne ravnoteže u svrhu ostvarenja programskih ciljeva Stranke u slučaju da je određen organ nepopunjen. Kooptiranje se vrši do ukupnog broja članova organa predviđenih ovim statutom.

Izuzetno, Predsjednik stranke i Glavni odbor mogu kooptirati dodatni broj članova u Glavni odbor ali ukupno do 10 % članova glavnog odbora u odnosu na broj članova predviđen ovim statutom.

Kooptiranje u Predsjedništvo vrši Glavni odbor na prijedlog Predsjednika stranke, i to do popune Predsjedništva a izuzetno i 10 % više u odnosu na predviđeni broj.

Kooptiranje u Predsjedništvo stranke vrši Glavni odbor na prijedlog Predsjednika Stranke.

Predsjedništvo Stranke može izvršiti kooptiranje u niže organe do 5 % ukupnog broja članova tog organa. Kantonalna organizacija, može kada je to potrebno, izvršiti kooptiranje na općinskom nivou do 5 %.

Kooptiranje u kantonalne/regionalne organe i organe Brčko Distrikt BiH, vrši se po prijedlogu Izvršnog odbora, a kooptiranje provodi Skupština kantonalne/regionalne organizacije i organizacije Brčko Distrikta BiH, i to do popune upražnjenih mjesta a izuzetno i 10 % više u odnosu na predviđeni broj članova.

Kooptiranje u općinske/gradske organe, vrši se po prijedlogu Izvršnog odbora općinske/gradske organizacije, i to do popune upražnjenih mjesta, a izuzetno i 10 % više u odnosu na predviđeni broj članova, a kooptiranje provodi Skupština općinske/gradske organizacije.

Kooptiranje u Povjereništva, vrši se sa kantonalnog/regionalnog nivoa.

#### **Član 77. (Posebni oblici unutarstranačkog organiziranja)**

U stranci se mogu formirati posebni oblici unutarstranačkog organiziranja.

Saglasnost za formiranje interesnog oblika organiranja, na prijedlog Predsjedništva Stranke, daje Glavni odbor Stranke.

Posebni oblici unutarstranačkog organiziranja mogu biti:

- Organizacija mladih;
- Organizacija žena i
- drugi posebni oblici unutarstranačkog organiziranja koji nisu u koliziji sa principima Stranke.

Interesne organizacije imaju svoja pravila koja moraju biti u skladu sa programskim načelima i Statutom Stranke.

Članstvo u interesnim organizacijama stiče se odobrenjem zahtjeva upućenog rukovodstvu organizacije.

Saglasnost na pravila interesnih organizacija daje Predsjedništvo stranke.

## **X IZBORI I REALIZACIJA IZBORNOG PROGRAMA**

### **Član 78. (Opća pravila)**

Izbori u Stranci mogu biti redovni i vanredni. Redovni izbori za sve organe Stranke održavaju se svake pete godine. Izbori za sve organe i funkcionere u Stranci provode se tajnim glasanjem između više kandidata. Pravila izbornog postupka u svim strukturama Stranke donosi Glavni odbor, na prijedlog Predsjedništva Stranke.

Glavni odbor utvrđuje kriterije za predlaganja kandidata Stranke za vijećnike i zastupnike kao i kandidata Stranke za obavljanje drugih poslova i aktivnosti u ime Stranke.

Izuzetno Kongres može o pojedinim pitanjima odlučivati javno, aklamacijom.

### **Član 79. (Način odlučivanja)**

Predsjedništvo Stranke odlučuje o podršci Stranke kandidatu druge političke organizacije ili nezavisnom kandidatu na izborima za državni, entitetski i kantonalni nivo zakonodavne ili izvršne vlasti.

Glavni odbor odlučuje o učešću Stranke u formiranju koalicione vlade, u skladu sa Statutom.

Predsjedništvo Stranke daje saglasnost na imenovanja kandidata Stranke odnosno utvrđuje prijedlog kandidata za pozicije u izvršnoj vlasti na svim nivoima u skladu sa Statutom.

### **Član 80. (Provedba izbornog programa na izvršnim nivoima vlasti)**

Članovi Vijeća ministara BiH, kao i članovi vlada na ostalim nivoima vlasti dužni su, ukoliko su kandidati Stranke, da sprovedu izborni program koji utvrdi Glavni odbor.

Ako je predsjedavajući Vijeća ministara BiH ili premijer kandidat Stranke, dužan je Predsjedništvu Stranke predlagati politiku koja obezbjeđuje realizaciju izbornog programa Stranke.

### **Član 81. (Provedba izbornog programa na nivou lokalne samouprave)**

Funkcioneri lokalne samouprave, ukoliko su članovi Stranke, dužni su sprovesti izborni program koji usvoji općinski/gradski odbor.

Načelnik općine/gradonačelnik, ukoliko je član Stranke, predlaže općinskom/gradskom odboru politiku lokalne samouprave, koja osigurava realizaciju izbornog programa.

Predsjednik kantonalne vlade, ukoliko je član Stranke, predlaže kantonalnom odboru politiku koja obezbjeđuje realizaciju izbornog programa.

### **Član 82. (Klub zastupnika i klub vijećnika)**

Klub zastupnika sačinjavaju svi zastupnici, a klub vijećnika svi vijećnici sa liste Stranke u odgovarajućoj skupštini/vijeću ili parlamentu.

Član kluba zastupnika odnosno vijećnika dužan je da poštuje principe i interese Stranke i zastupa politiku Stranke u odgovarajućoj skupštini/vijeću ili parlamentu.

U slučaju nepoštivanja principa i interesa Stranke može se pokrenuti postupak za utvrđivanje odgovornosti vijećnika odnosno zastupnika.

Član kluba zastupnika odnosno vijećnika, obavezan je da prisustvuje sjednicama kluba i sjednicama vijeća ili parlamenta.

Predsjednik kluba zastupnika na državnom, entitetskom ili kantonalnom nivou podnosi godišnji izvještaj Predsjedništvu Stranke, a predsjednik kluba vijećnika godišnji izvještaj podnosi općinskom i kantonalnom odboru Stranke.

Klub zastupnika, odnosno vijećnika, može donijeti svoj Poslovnik o radu.

## **XI POSEBNE ODREDBE**

### **Član 71. (Imovina i finansiranje)**

Stranka ima imovinu.

Imovinom upravlja Predsjedništvo Stranke.

Stranka se finansira u skladu sa Zakonom o finansiranju političkih stranaka.

Predsjedništvo Stranke, na prijedlog Glavnog odbora Stranke, usvaja finansijski plan najkasnije do 31.12. tekuće godine za narednu godinu.

U slučaju da Kongres donese Odluku o prestanku rada Stranke, Kongres će na istom zasjedanju odlučiti o imovini Stranke.

## **XII PRIJELAZNE I ZAVRŠNE ODREDBE**

### **Član 72. (Izmjene i dopune Statuta)**

Izmjene i dopune ovog Statuta vrše se na način i po postupku njegovoga donošenja.

Svi akti Stranke moraju biti usklađeni sa ovim Statutom.

Glavni odbor može, izuzetno, između dva Kongresa, pojedina pitanja urediti i statutarnom odlukom. Odluke sa statutarnom snagom Glavni odbor donosi dvotrećinskom većinom od ukupnog broja članova Glavnog odbora. Glavni odbor odluke sa statutarnom snagom podnosi na verifikaciju Kongresu.

### **Član 73. (Održavanje prvog Kongresa)**

Prvi Kongres Stranke održat će se u roku od 4 (četiri) godine od dana osnivanja Stranke. Odluku o sazivanju prvog Kongresa donosi Glavni odbor Stranke u kojoj određuje broj, način izbora delegata i datum održavanja Kongresa.

### **Član 74. (Stupanje na snagu)**

Ovaj Statut stupa na snagu danom donošenja.



Sarajevo, decembar 2023.